

COMUNICATO n. 1463 del 28/05/2025

Offe da earst lukh, 'z izta zait sin atz 30 von prachant. Dena di vorsch mang bidar khemmen inngètt von 8 von herbestmånat sin atz 23 von bimmat. Untargelekk vünf mildjü euro vorz djar 2025 un åndre vünve vorz djar 2026

Von 19 von madjo vort di vorsch zo schütza di lentar boda stian åna laüt

[Cimbroy] Åhevante von 19 von madjo vort iz möglich inngem in vorsch zo haba in schütz auzzorichta di haüsar bodase vennen in di 32 kamöündar boda soin khent zornìrt zo üntarstütza nå in prodjekt zo helva in sèlln lentar bodasan hãm mångl obromm di laüt gian zo leba vort.

Dar vorsitzar vodar autonome Provìntz vo Tria, Maurizio Fugatti dar djenerål diridjént von dipartimént urbanistika, kraft, katasto, tavolare un lånt pintom, Giovanni Girardelli un di dirèktören von Åmt vor di politike vorz haus Francesca Chemolli hãm gezoaget inar prèss konferéntz bia innzogeiba di vorsch, ma makz tüan lai on line, durch di “Khåmmar von pürgar”.

“Ma hatt gepitet disan momént, haltante kunt von groaz interesse boda iz khent gezoaget vor disarn initziatíf sin vo balmasan hatt geredet vor da earst bòtta, auz vodar provìntz un auz von Beleschlånt o, un natürlích in vüarom bodasen ågeat garade- dise di börtar von vorsitzar Fugatti – Ma hofft azta allar disar interèse mage khemmen z’soina eppaz mearar konkrèt boda, åhevante von haüsar pint mearar di laüt von 32 kamöündar zornìrt. ’Z iz a sperimentål initziatíf, un vor daz sèll saibar boroatet zo schètza bida bart soin mångl eppaz zo bèksla odar zo pezzra, aftz ditza, darzuar in sèll bodada lekk di provìntz, di privètt soin o gerüaft zo legada untar vil un nèt lai azpe gèlt” hatta no khött dar vorsitzar.

Vorz djar 2025 soinda khentvürgelekk zboa zaitn innzogeiba di vorsch: von 19 von madjo sin atz 30 von prachant un dena von 8 von herbestmånat sin atz 23 von bimmat. Di vorsch mang khemmen inngètt lai on line durch di “Khåmmar von pürgar” – pittnåndar pitt alln in biravan boda soin mångl – aftz disan indiritzo: <https://www.provincia.tn.it/Servizi/Contributo-per-immobili-privati-rivitalizzazione-aree-rischio-abbandonato>.

Vor disan prodjekt soinda khent untargelekk in gantzzen zen mildjü euro (vünve vorz djar 2025 un vünve vorz djar 2026). Zo helva in pürgar auzvülln di formularn vor in vorsch un zo macha bizzan allz baztada iz mångl zo nemma toal in auzschraib izta khent augelekk an **informatíf schaltarle durch telefón** durchgeviart von Åmt vor di urbanistik bodase vinnt in bege Malta 67 ka Tria. ’Z schaltarle iz offe von menta aftn vrait vo di noüne sin di zbölve mòrgas dar nummar iz dar **0461 492712**.

Darzuar izta an indiritzo vo eltronische post lai vor ditza: recuperocestristorici@provincia.tn.it.

Ber makda inngem in vorsch

Dar vorsch mage khemmen inngètt lai vo laüt (nèt firme odar feroine) boda sa hām odar boda vor da auz soìn sèks māt batn hām a haus dar soinen in ummaz von 32 lentar interesàrt. Aniaglaz mentsch mage vāngen schütz daz mearaste vor drai quartìarn. Dar zbing iz azta almānko ummadar von quartìarn saibe daz haup haus drinnzolebeda sèlbart odar zo vorzisa pittnan bolvln zis.

’Z haus mocht khemmen gelebet odar vorzist daz mindarste vor zen djar.

Dar schütz mage dekhan an toal von sèll boda khint gezert zo khoava ’z haus, ditza lai az nèt soìn vraütn von earst grado zo vorkhoava, un mage nèt khemmen genützt gāntz lai zo khoava. Berda hatt mearar baz 45 djar un bill nützan in quartìaro azpe haup haus mocht nèt hām soìn vonsitz in kamòu boda iz ’z haus von tage 6 von snitt 2024.

Schütz vürgelekk

- **auzzorichta:** sin aftn 40% von sèll boda khint gezert in di storesche zentrum un in 35% afte āndarn saitn, sin atz 80.000 euro (aftnan khost daz mearaste vo 200.000 euro, daz mindarste vo 10.000 euro).
- **zo khoava:** 20% von khost von gāntz haus sin 100.000 euro von sèll boda khint gezert.

Bazta khint geschützt

- **Innante** (daz mearaste 125.000 euro): soléttn, maurn, seraméntn, bazzar, haitzug (auz baz fotovoltaische zelle) liacht, innate stiang lai vor in quartìaro.
- **Auzante** (aftaz gāntz haus odar aftaz sèll boma sek): tach, maurn, sachandarn pittnan groazan vèrt, stiang, pontesöltn, zöü.
- **Tèknisch:** sin aftn 10% von sèll boma zert vor aniaglana kategori (innante/auzante)

Pintom

Berda inngitt in vorsch mocht soìn padrù von haus balz āvorst odar vorda auz soìn sèks māt. ’Z haus mocht nèt gehöarn in katastaln kategorian A1, A8 odar A9 un mocht nèt hām mearar baz acht quartìarn un darzuar mochtz nèt soìn toal vonan kondominio. Aniagladar schütz bart hām an kòditze CUP boda mocht khemmen geschribet aftna aniagalana rèchnung boda khint inngètt zo zoaga bazma hatt gezert. Di rèchnung mochan khemmen inngètt vorda auz soìn 24 māt sidar azta iz khent zuargètt dar schütz. ’Z iz verbotet leng disan schütz darzuar āndre öffentlesche schütz zuargètt, vor di gelaichegen arbatn in di lestn zen djar.

Bia innzogeba di vorsch

Di vorsch mang khemmen inngètt āhevante von menta atz 19 von madjo afte plattform on line aftn indiritzo: <https://www.provincia.tn.it/Servizi/Contributo-per-immobili-privati-rivitalizzazione-aree-rischio-abbandono>

boma mage o seng allz bazta āgeat disan prodjèkt. Azta hebatn z’soina mearare laüt boda vorsan in schütz vor daz gelaichege haus odar quartìaro, bartz soìn lai an uantzegez mentsch (pinn SPID odar CIE) innzogeba in vorsch.

Briavan boda soìn māngl

Berda inngitt in vorsch mocht āhengen:

- Tèknesche relatziong untarschribet vonan profesionìst boda khint geschribet baz ma bart tüan;
- Vorkhost un meter rèchnung;
- Azta soìn mearare āvorschar mochte soìn dar mandatt vo aniagaln āvorschar vorz mentsch boda inngitt in vorsch;
- Aztada soìn āndre padrù, se o bartn mochan zuargem zo macha di arbatn zo boda khemmen gemacht.

Roatordnung

Di vorsch bartn khemmen geschètz t nâ in sèll boda auzmacht di delibera boma mage vennen afte websait
<https://www.provincia.tn.it/Servizi/Contributo-per-immobili-privati-rivitalizzazione-aree-rischio-abbandono>

Di kamöünder

Dar prodjèkt gaet â disan kamöünder: Altavalle, Bleggio Superiore, Bondone, Borgo Chiese, Bresimo, Canal San Bovo, Castel Condino, Castello Tesino, Cis, Cinte Tesino, Dambel, Frassilongo, Grigno, Livo, Lusérn, Mezzano, Novella, Ospedaletto, Peio, Pieve di Bono-Prezzo, Pieve Tesino, Rabbi, Rumo, Sagron Mis, Segonzano, Sover, Terragnolo, Tre Ville (**auz baz Palù vo Madonna di Campiglio, Katastàl Kamòu “Ragoli II”**), Valdaone, Valfloriana, Vallarsa, Vermiglio.

Übarsetzt von Schaltarle vor di zung von Toalkamou vodar Zimbar Hoachebene

(us)